



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretionem Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

§. 34. Divinae providentiae in omnibus acquiescendum

urn:nbn:de:hbz:466:1-9969

§. XXXIV. *Divina providentia in omnibus acquiescendum.*

Bonum est optare, à Deo affligi, & multa pro eo pati, sed multò melius est ipsius dispositioni, & beneplacito in omnibus acquiescere, & orare, ut nos ducat quo ipse vult. Vita naturalis motu & sensu se prodit, vita supernaturalis omnis motus & sensus cessatione, & defectione. Qui enim se deserit, omnesque motus animi sui in Deum transfert, is vitæ gratiæ vivit, & à se ipso ita est expeditus, ac si de se nihil sciret, velut infans cujus est unius diei vita super terram. Quicquid sibi acciderit, non in se respicit, sed in divina voluntate, & providentiâ. Nihil ex hoc seculo sibi applicat, nisi quod vult Deus, in cujus manu tamquam instrumentum est artificis arbitrio ad quodcunque opus applicandum. In divinis consiliis perscrutandis curiosus non est, sed illa humiliter adorât, firmiter credens ea semper justa esse, licet sæpè occulta sint. Idem vult quod Deus vult, eodemque modo, atque eandem ob causam propter quam ille vult. Suam voluntatem divinæ conformat, quo ad omnia bona naturæ, gratiæ, & gloriæ; itaut suis actibus, & sua libertate, quantum fieri potest, spoliet se, ut sola Dei voluntas in ipso vivat, & operetur. Cum enim voluntas corruptæ naturæ vitio se plurimum amet, & in suis actibus veluti possessione delectetur, tametsi unicam Dei gloriam quærat, eam tamen actu proprio vult, & in eo complacet sibi tamquam in proprio bono: ex quo fit, ut si ipsum propriæ voluntatis actum, & gaudium quod ex eo provenit, sibi prorsus adimat, tunc verè & perfectè divino beneplacito acquiescere censenda sit, suamque voluntatem in divinam purissimè transfundere cum omnimodâ sui ipsius, & omnium creaturarum oblivione. Voluntas Dei necesse est ut fiat, omnia enim quæcunque voluit Dominus fecit, & non est qui possit resistere voluntati ejus: tunc autem optimè fit, cum in nobis, & à nobis fit.